


Mazarin
3657

Les sentiments du vray citoyen...

UNIVERSITY OF N.C. AT CHAPEL HILL



00023010554

RARE BOOK
COLLECTION



THE LIBRARY OF THE
UNIVERSITY OF
NORTH CAROLINA
AT
CHAPEL HILL
Mazarin
3657

LES
SENTIMENS

DU VRAI

CITOYEN

SVR LA PAIX

& vnion de la Ville.

Par le Sieur B.



A PARIS,

Chez NICOLAS PILLON, proche la Fontaine de
Saint Benoist.

M. DC. XLIX.

Avec Permission.

N^o 38

— 41. 14. 11. 88. 7.

LES SENTIMENS DV VRAY CITOYEN,
sur la Paix & union de la Ville.



MY Lecteur, qui que tu sois, ie suis Citoyen comme toy, & ne suis pas moins zelé au bien public, n'y moins intéressé en la fortune particuliere de cette auguste ville de Paris. C'est ee que ie te prie de croire, afin que mon discours ne te soit point suspect, & que nos volontez puissent demeurer vnies comme nos interrests.

Dans les desordres d'un Estat ainsi que dans les maladies aiguës il y a des iours de crise funestes ou salutaires, qui decident la cheute ou la restauration du sujet; ces iours quelques bons pronostics & quelque heureuse suite qu'ils puissent apporter, ne laissent pas d'auoir de perilleux accez, & nous l'auons esprouué ces derniers iours: Car alors que le Parlement & les Princes estoient occupez à ces importantes deliberations, où il s'agissoit de resoudre la Paix ou la Guerre, & de diuiser le Royaume en deux partis, qui peuuent le reduire en poudre. Il s'est veu grand nombre de seditieux & de turbulents qui sans attendre l'issuë des Assemblées, & sans prendre d'autre conseil que de leur aueugle fureur, ont commis mille indignitez à l'endroit des Senateurs, sans respecter la personne des Princes, & des Generaux du Peuple; les vns, sans sçauoir ce qu'ils veulent, ny se qui leur est bon, demandent confusément la Guerre, & crient aux armes; les autres portent leurs mains insolentes sur ces mesmes Senateurs, & tous ensemble n'ont pour but qu'une horrible sedition; dont ils font vne dangereuse ouuerture; en sorte qu'il s'en est peu fallu que cette premiere ville du monde ne soit arriuée à son terme, & qu'elle n'ait trouué ses funorailles dans les limites de sa propre grandeur.

Il ne seroit pas besoin de refuter les sentimens de ces mutins, ils portent leur propre condamnation, puis qu'ils sont assez farouches & assez barbares pour resister à la Paix, que tous les honnestes gens desirerent & regardent auourd'huy, comme le souverain bien de l'Estat, & le soulagement vniuersel de tous les Peuples; Mais d'autant que parmy les esprits, il y en a plus grand nombre de credules & de susceptibles de toutes formes, qu'il n'y en a de veritablement sages. Il est tres à propos de preuenir les dangers qui peuuent en arriuer, & de forcer en peu de mots ces mesmes mutins à recognoistre & confesser leur tort.

Alors que la Guerre est estrangere, & que le Printe porte ses armes & les fait subsister hors l'étenduë de son Empire. Que ses desseins soient iustes, ou qu'ils soient ambitieux vne Guerre de cette nature est facile à porter les peuples par son éloignement ne la ressentent pas. On ne leur parle que de victoires & de trophées; Et de mesme, que les Anciens Citoyens de Rome, ils ne voyent Bellonne cette farouche & superbe diuinité, que sur un Char de triomphe qui leur amene des captifs & du butin, & qui leur promet des felicitez perdurables.

Mais quand il s'agit d'une Guerre intestine dans un Royaume desia consummé par des persecutions de trente années, & dont tous les habitans aigris de leur

3

propre misere, se trouuent presséz dedans & dehors par des ennemis cruels & sacrilèges, qui commettent tous les crimes du monde, & ne pardonnent pas mesme à la sainteté des Autels. Quand il faut considerer la moitié des suiets reuoltéz contre l'autre, les Princes contre les Princes, le Pere, & le Fils, les Freres & les amys les vns contre les autres, tous les hommes prests à s'égorger, bref toutes choses dans vne combustion effroyable, & dans vn desordre general qui menace & fait toucher du doigt la cheute de la Monarchie. Mutins, ce n'est plus vne guerre, c'est vn fleau de Dieu, & la marque assuree de sa vengeance & de sa malediction. I'en dirois d'auantage, & l'exposerois les necessitez ou le siege nous à réduits, s'il y auoit quelqu'un qui les peust ignorer, cependant vous criez à la Guerre, & vous vous figurez que vostre condition en deuiendroit meilleure, vous n'estes pas aussi bonsorateurs que Demosthenes pour la persuader; mais peut-estre seriez vous aussi lasches que luy s'il en falloit vser: car apres auoir armé toute sa Patrie contre la puissance de Philippe, & qu'il eust luy-mesme disposé la bataille, il fut le premier qui rompit les rangs, & qui ietta ses armes pour se sauuer plus legerement. Ce n'est pas le nombre n'y le tumulte qui gaigne les batailles, & si vous ne pouuez souffrir que l'on vous conduise dans la Paix, qui sera celuy qui voudra vous conduire à la Guerre, ou l'obeissance doit estre mille fois plus grande, & quel d'entre les Generaux pourra se resoudre de mener tant de Capitaines sans ordre & sans discipline, & qui peut-estre voudront marcher avec plus de bagage que n'en auoit l'armée de Xerxes.

Ie veux que vos mouuemens soient iustes, ie suis d'accord avec vous qu'il faut dégager la Ville, reconquerir le Roy, le remettre dans son Trosne, ruiner & chasser les tyrans: qu'il faut reestabli toutes choses, & remettre les Loix & le Gouvernement dans son ancien vsage; ie veux toutes ces choses aussi bien que vous, & toutefois ie desire s'il se peut de les obtenir par les aduanrages de la Paix, ou par des vietoires innocentes, plustost que par la fureur d'une guerre irreconciliable.

Nos ennemis qui se trouuent encores plus presséz, & qui craignent le iuste courroux de Dieu contre lequel ils combattent en combattant contre nous, eux-mesmes ont fait l'ouuerture de cette Paix, ils l'a desirerent plus ardamment que nous, & vous vous opposez à ce bien commun, & ne pouuez vous resoudre d'en attendre la fin ny l'euénement. Citoyens si vous pouviez enuifager les maux que cette Guerre dans ses meilleurs succez, vous prepare aussi bien qu'à nos ennemis, & qui menacent le vainqueur ainsi que le vaincu, vous n'auriez garde de resister à de si iustes resolutions, & l'un & l'autre se relacherait bien plustost que de se porter à ces dernieres extremitez, dont la suite funeste peut durer plus que nous.

Chacun parmy les Chefs s'accorde à la Paix; ces Princes genereux abandonnent leur propres interets afin de rendre les vostres plus aduantageux, & ces zelez Senateurs se trouuent tellement vnis avec le peuple, qu'ils exposent, & leur fortunes, & leurs vies pour sa liberation. Chacun d'eux fait paroistre son courage aussi bien que sa prudence en la conduite de cet ouvrage de Dieu, & toutefois cette mesme conduite demeure suspecte, & n'est point au gré des mutins; Ils se iettent dans la diffiance de cet accommodement & ne peuuent croire qu'il puisse produire vne Paix durable & solide; Ie veux que leurs soubçons soient excusables & que cette Paix puisse estre interrompuë, mais seroit-il iuste que cette crainte preualut sur vne tentatiue de cette consequence qui n'embrasse pas moins que le salut de l'Estat, & qui doit en

4
tout est iustifier nos armes & nos desseins & conuaincre nos ennemis de leur dernière iniustice. D'ailleurs si nous sommes deceus, ou que cette Paix ne se puisse acheuer à la gloire & l'aduanantage du party, quelles vtilitez y aurons nous perduës que nous ne puissions mieux recouurer par le secours de nos voisins ou par les armes des Estrangers qui prennent part en nos iustes interets, & qu'elles forces pouuons nous auoir quelles ne se trouuent alors augmentées par nos propres resolutions, & par la protection de Dieu mesme, qui se plaist à confondre les superbes & les tyrans.

Voila, Citoyens, l'un des Auis que i'auois à vous donner sur les dispositions de la Paix il en reste encores vn qui n'est pas moins important. C'est la concorde & l'union que vous deuez auoir entre vous, du moins si vous desirez vaincre & surmonter vos ennemis; Ce n'est pas tout que d'entreprendre il faut preuoir aux moyens de réussir, & dans ce grand dessein qui vous engage avec la fortune de tous les peuples le soin qui vous doit le plus occuper, est de conseruer vne vnion parfaite avec tous vos Chefs: & d'auoir pour eux vne obeïssance aueugle avec vne estime raisonnable de leur conduite & de leur courage autrement si ces choses vous manquent, cette ardeur & cette emulation genereuse qui fait les prodiges & les miracles se relaschera bien-tost, & les actions les plus considerables demeureront imparfaites, & sans aucun effect.

Le second soin, que vous deuez auoir, est de secourir la chose publique de vos auis & de vostre argent dans les pressantes necessitez, & de preferer en toutes choses le bien public à vostre interet particulier. C'est ce qui s'appelle vne veritable vnion, & ce qui fait que Venise resiste au Turc depuis tant de siecles, & que Rome & Athenes se sont veuës les maistresses du monde. Ceux qui suiuront des maximes contraires soit au respect des sieges ou du progrès des Villes ne verront pas les iours heureux, & quelque fortune qui les puisse accompagner, ils tomberont tousiours dans l'opprobre de leurs voisins, ou de leurs ennemis. La plus grande Cité du monde qui commandoit à l'Empire de Grece par la diuision, & par l'extreme auarice de ses habitans, a veu changer ses Loix, son Monarque, & sa Religion qu'elle entraïna dans son mesme tombeau, & ie pourrois rapporter vne infinité de desastres pareils s'il en estoit besoin, & si la necessité presente ne nous en faisoit assez voir le peril. Conseruez donc cette vnion, chers Citoyens, puis qu'elle fait vostre puissance & vostre grandeur, & qu'elle est de soy si parfaite & si desirable; seruez vous de ces exemples, & de celuy mesme de la Nature qui n'opere ses merueilles, & ne souffre ses accidens que par ces differends & contraires effects.

Que si comme Chrestiens, vous voulez encherir sur ce commun aduanantage, vous ferez encores plus, si dans la conioncture presente vous supportez couragementement les travaux & les necessitez du siege, & si vous auez assez de tendresse & de charité pour secourir ceux qui se trouueront plus presseés & plus incommodés que vous, chacun se doit manifester en cette grande occasion, & mettre à l'épreuue son courage & sa vertu. Ce n'est pas tousiours dans la Paix, & dans l'oisiveté que s'exercent les plus belles actions, la guerre & les calamitez ont fait plus de Saints, & plus d'hommes illustres, que l'abondance & le repos, & de quelques travaux dont le siege vous puisse menacer, vous les surmonterez, sans doute, si chacun veut s'efforcer à bien faire, & ces mesmes travaux ne vous seront pas inutiles s'ils peuvent vous rendre vertueux.

Mais il me semble que l'entends encores le murin ou plustost le sedition, qui s'ar-

troupe

troupe & qui parle hautement & publiquement, comme si desia nous estions tombez dans les desordres d'une republique mal regie, où chacun veut estre Maistre, & veut introduire son opinion pour la meilleure. Dieu, que ce fatal Gouvernement dont Paris nous fait voir vn affreux image nous represente de mal-heurs, & combien il se trouue éloigné de la Noblesse & de la tranquillité de l'Estat monarchique, dont le modelle & l'origine viennent du Ciel & retournent à luy, ces mutins qui ne tendent qu'à sedition, & qui veullent entamer l'union de la Ville & de ses Citoyens crient par tour qu'il y a des traistres & qu'il les faut punir, & leur fureur a passé si auant que l'on s'est desia veu prest à croiser les armes, leur espoir n'est pas l'auantage du bien public, ils n'ont pas de si nobles desirs, ce n'est que le sac & le pillage de vos maisons, Citoyens, que ces mal-heureux enuifagent, & si vous n'y prenez garde vous tomberez dans cet extreme accident, & verrez transferer chez vous ces horribles seditions de Syracuse, de Rome, de Florence, & de tant d'autres ou le nombre des morts à souuent excédé celuy des viuans; vous verrez vostre Ville partagée comme celle de Naples, qui depuis peu de iours s'est veüe diuisée de quartier en quartier, & a veu ses Habitans rue contre rue se batailler les vns contre les autres: enfin vous pourrez voir vos ennemis sur vos remparts pendant que vous vous esgorgeretez, & qui viendront pesse-melle acheuer vostre deffaitte, & porter le fer & le feu de tous les costez:

C'est tout ce qu'ils demandent que vous voir déchirer de vos propres mains, & si ce desastre vous arriue, ils auront le Triomphe & la Victoire à bon marché: tout ce qu'ils ont fait iusque icy n'a rendu qu'à ce mouuement tragique: quand ils ont bloqué la Ville, ils ont creu qu'elle ne durerait que trois iours; ils ont fait semer des billets à cette fin; ils ont enuoyé des Herauts avec charge demouuoir le peuple; ils ont fait sous main achepter vn nombre infiny de pains aux premiers iours, en sorte qu'il s'en est trouué iusques à douze cens dans le cabinet d'un scelerat qu'on a logé dans la Bastille: bref tous leurs desseins n'ont eu que ce funeste espoir, & cependant ces esprits seditieux y donnent lieu, & comme s'ils estoient eux-mesmes ces traistres: dont ils se plaignent, ils veulent faire pis & commencer le carnage de leurs voisins & de leurs amis. Quel d'entre vous, Citoyens, seroit en seureté, & quel mesme de ces mutins pourroit sauuer sa vie, s'il auoit vn ennemy qui peust crier, c'est vn traistre, ne suffiroit-il pas d'une parole pour faire massacrer le plus homme de bien, & ne verrions nous pas encore vn coup la fureur des Caboches, des Bandoz & des Armaignacs qui sous le regne & pendant l'égarement ou la minorité de Charles VI. egorgerent plus de quatre mille personnes des plus notables de Paris, & qui n'auoient point d'autre crime sinon qu'ils estoient trop gens de bien. Quel desordre plus grand nous pourroit arriuer, & quel fruit mesme pourrions nous esperer d'une diuision moins violente s'il estoit permis d'acuser tout le monde, & s'il suffisoit d'un seul soubçon pour condamner vn homme & non pas pour le iustifier. Quel desordre & quel police pourroit-on retenir & quel chef (s'il estoit illustre) voudroit assuietir son ministere à tant de reuolutions, toutes choses y seroient confuses, & la contrainte si rude que nous aurions plus de peur de nos amis que de nos ennemis. En fin Paris deuiendrait monstrueux, & ses habitans n'auoient pas moins de fuir de s'en separer que les Geins en eurent de quitter Babylonne, puisque aussi bien tous leurs desseins y seroient confus.

Padoué qu'il y a des gens mal intentionez qui dans les commencemens, ont

essayé de nuire & de causer des desordres: ie suis d'accord qu'ils deuroient estre punis ou chassés, mais si l'on ne peut les conuaincre ouuertement ou s'ils se trouuent si fortement appuyez, qu'on ne puisse les choquer sans crouer la machine & sans ébranler le party, ne vaut-il pas mieux les laisser impunis, & conseruer des membres inutiles que de se les couper; doit-on s'estonner qu'il y ait des hommes qui s'égarent dans vne Ville si grande que l'on y compte mille ruës, & qu'il y ait des ver-tus malignes cachées dans les estoilles & dans les plantes. Je veux qu'ils ayent conspiré & formé des entreprises, quels progez ont ils fait qui n'ait esté surmonté, & qui ne le soit encore par le nombre & par la foy des bons, ou plustost par la propre grandeur de nostre cause qui s'est attiré toutes les puissances du Ciel & de la terre.

D'ailleurs, s'il faut s'aider de la Morale pouuons nous, quoy que nostre guerre soit iuste, forcer les inclinations de tous les hommes & les obliger à suivre nostre party, s'ils se trouuent engagez dans le party contraire, & finalement pouuons nous pretendre plus que Dieu qui n'a point assujetty nos volontez, & qui veut que l'on nous persuade, & non pas que l'on nous violente; nostre guerre n'est pas vne guerre formelle pour y pouuoir faire souscrire toute la Nation. C'est vne guerre de liberté que chacun veut & que chacun par consequent doit auoir, & dans laquelle nous ne pouuons reputer pour vray ennemis que ceux qui portent l'estendard contre nous, il faut lier les mains aux autres, & non pas les mettre en pieces; suffit pour nostre seurété qu'ils soient mis hors d'estat de nous nuire, les Magistrats y ont desia pourueu, le ministere leur a esté soustrait ou limité, & leur puissance est deuënuë si foible qu'elle est maintenant comme les ombres qui nous effrayent, & ne nous nuisent pas: separons la raison de l'opinion & de la phantasie, & n'imitons pas les bestes qui ne distinguent point & qui croient que tout ce qui les approche les veut offencer: si nostre cause est sainte elle nous deffend la violence, & ne nous permet pas de punir les crimes d'intention que la Loy generale, ny prescrite n'ont point encores condamnés, & que Dieu pardonne à tout le genre humain; s'ils sont iniustes laissons les iniustes plustost que de commettre iniustice, & s'ils sont raisonnables persuadons les par exemple & par raison; la clemence & la douceur ont des charmes qui corrompent leurs ennemis & se les consilient, seruons nous de leurs armes, & faisons comme Auguste qui n'eust plus d'ennemis, dès qu'il sceust pardonner & bien faire, peut estre en seront-ils vaincus, & que leur hayne ne sera pas d'vne nature si forte quelle ne se puisse transformer. Les Astres ne sont funestes que selon leurs aspects, & la terre à des serpens qui seruent à des operations merueilleuses, laissons donc couler le temps, il est des vertus variables aussi bien que des saisons, & ces mesmes hommes peuuent bien changez puis que l'homme change sept fois le iour.

Il faut mieux esperer d'eux & de la fortune de l'Estat; ils peuuent en estre forcez, & peut estre qu'estant reuenus de leur égarement, ils deuiendront plus fideles & plus ardens que nous, & briseront de leurs propres mains le simulacre qu'ils auront adoré.

Ce qui me reste à parler & dont ie ne puis me taire, c'est vne dangereuse liberté qui se rencontre parmy le peuple, non seulement de mal interpreter les actions & la conduite des Chefs, mais encore de les exposer & les mettre en compromis quand bon leur semble: les mutins sçauent se seruir de ces occasions, & ie doute que ce mal ne vienne de l'artifice de nos ennemis, qui nous s'appent de toutes parts

plustost que de l'erreur populaire. Quoy qu'il en soit nous auons veu ces iours passez que les Chefs du Parlement & les deux premieres testes de cét Auguste Corps, n'ont peu s'exempter des atteintes de la calomnie, & que leurs desseins sont deuenus suspects pour vne Conference paticuliere, en laquelle toutesfois s'ouuurent les premieres notions de la Paix, & les plus seurs moyens d'y paruenir, c'est vne verité maintenant auerée, & quoy que dans le temps & dans la cause qu'ils soustiennent ils ne soient tenus de se iustifier qu'avec Dieu, il est neantmoins equitable de les iustifier deuant les hommes, & de ne les point priuer de leur recognoissance & de leur amour, parce que leurs desmarches ont tousiours esté moderées & conuenables à la pesanteur de leur ministere, & que comme des Dieux, ils ont regardé tous les temps & considéré toute choses, certe haute sagesse n'a pas trouué les esprits tous fauorables ny capables de la cõgnoistre chacun s'est meslé de l'expliquer, peu de gens se sont mis à leur place pour raisonner de leurs fonctions, & n'ont point apperceu que dans la conioncture du temps, ces Princes du Senat sont aussi bien les Protecteurs de la minorité des Roys, que les defenseurs des peuples & que l'honneur, & la consciẽce les oblige & les restraint enuers les deux également. Crois-tu, Lecteur, que ces extrêmes soient si faciles à balancer & si faciles à reünir, quand ils sont vne fois separez? qu'ont-ils fait iusques icy, qui n'ait esté à l'aduantage de l'un & de l'autre, & s'ils ont penché n'est-ce pas du costé le plus foible? s'ils ont soutenu la Couronne & la Maieité du Prince, s'est-il veu porter plus haut & l'interest du peuple, & l'honneur du Senat. Enfin qu'ont ils fait parroistre dans leurs cõseils ou dans leurs discours qui n'ait embrassé en soy la gloire de Dieu, l'honneur du Prince, le salut des peuples & la Paix & l'vnio qui doit leur estre inseparable: pouuõs-nous les conuaincre d'auoir tant soit peu varié, & s'ils sont nos Iuges, les condamnerons nous sans les ouïr, nous leur deuõs au moins la grace de les examiner & de recourir aux preuues & non pas à la presumption; & s'il est permis de se seruir des ressemblances & de iuger des sentimens de l'ame par les signes exterieurs, voyons si leur consciẽce les a rendus timides ou les a fait changer; plusieurs à la derniere conspiration du peuple surpris de l'opinion & poussez de la fureur vulgaire, ne parloient que d'attenter à leurs vies & de briser les portes du Pallais, tout le monde les estimoit perdus chaque moment suspendoit la reuolte, eux seuls furent les moins esmeus, & sans l'obstacle qui leur fut fait, ces grands hommes alloient en s'exposant appaiser le desordre, & par leur mort iustifier leur innocence. C'est vn exemple rare & non pas extraordinaire; Car au iour des barricades, le premier d'eux eüst la mesme constance, & l'appelle à tesmoin ce nombre infiny de mutins & d'aveugles nez qui vouloient iuger du Soleil, & porter le poignard dans le sein de leur Pere, s'il ne leur parust & ne leur parla pas d'un sens & d'un visage aussi rassis que s'il eüst esté dans son Tribunal: A-on ouï parler d'une plus grande fermeté, & s'est-il veu des criminels qui se soient presentez à la mort avec tant d'audace & de resolution, la Paix & la tranquillité faisoient certe magnanime constance, & s'il te faut, Lecteur, quelque autre tesmoignage de ces communes veritez, lis ou apprends les Harangues, & les discours heroïques qu'il a proferez deuant le Prince, & deuant le Senat, & par lesquels il a si souuent terrassé l'orgueil & la fierté de nos ennemis, & tu pourras recognoistre qu'ils ont esté les motifs, quel est son courage, & quel est son sçauoir. L'Arrest du huietiesme Ianuier qui fut vn Arrest vrayement en robe rouge, & le plus hardy qui iamais fut rendu, ne fut-il pas prononcé par la bouche de cét oracle. Et ce grand coup de foudre (malgré

La calomnie, eust-il esté par luy-mesme lancé si son Genie se fust trouué capable de frayer ou capable d'alteration. Eust-il pas peu s'en dispenser, s'il ne l'eust point creu iuste, & de plus mettrons-nous en oubly cette vertu diuine, & ce courage sans pareil, qu'il a rescelement fait paroistre alors qu'à la honte des ennemis enuironné de leur puissance, & de leurs legions, il a si genereusement repoussé l'abord & la presence du tyran, & de l'auteur de la Guerre, qui pretendoit l'entrée aux Conferences de la Paix. Falloit-il pas estre bien pur & bien grand pour estre si ferme & si resolu. L'on nous parle des Anciens, l'Histoire nous apprend que Caton soustint la dignité du Capitole contre les desseins de Cesar, & balança si longuement la fortune de Rome avec l'ambition de cet vsurpateur, que du moins il en recula la domination tant qu'il vescu; Mais qu'à fait ce fameux politique que celui-cy ne l'ait surpassé. Caton pour trop hazarder fit enfin succomber Rome, & celui-cy conduit Paris & tout le Royaume à la Paix, apres auoir effacé la puissance du commun ennemy, & croit qu'il vaut mieux luy souffrir vn azile, que d'exposer l'Estat tout entier & la vie d'un million d'hommes à le poursuiure. En effet ne vaut-il pas mieux conseruer le sang de la patrie que de le prodiguer pour vne cause si honteuse & si indigne. N'est-ce pas assez de l'auoir mis en route & de luy auoir osté le credit & le pouuoir de nous nuire, sans vouloir porter nos desseins au delà de nos interets, si la Paix qui se dispose nous peut apporter le repos & le soulagement, pourquoy desirer la guerre qui ne nous prepare que de longues miseres & d'estranges accidens; Ce n'est point à nous à donner la loy n'y d'aspirer à la gloire: Laissons ces choses pour le Prince, puis qu'elles sont de son partage, & prenons garde de ne point esbranler son Trofne sous prétexte de l'affermir, Quittons donc ces erreurs, esperons en la conduite de ces hommes prodigieux, & tenons pour certain qu'apres ce grand Ouurage, nous les verrons au milieu de la Paix, & de la gloire, iouir d'un plain repos, & du sein de leur Patrie qu'ils auront conseruée, respandre des lumieres & des vertus sur tous les peuples du monde. Ce sont les sentimens, Lecteur, que tu dois en auoir, & croire si tu ne veux point te tromper que celui qui te les inspire, est le dernier à les louer, & qu'il a moins d'enuie de les obliger que de rendre hommage à leur vertu.

Au reste souuiet toy des preceptes de ce discours d'obeir, & de croire que tes Chefs tous ensemble sont plus sages que toy seul, de contribuer de toute ta puissance à l'vnion & société de tes Concitoyens, de n'auoir point d'oreilles ny de pensées pour les choses qui tendent à diuision, & de n'ouïr les discours des seditieux que comme ceux des corbeaux qui sont funestes & que personne n'escoute, & sur tout garde toy de leurs mains.

F I N.

